

خطِ پوُلُسِ بَلَدِه ايماندارای

فیلیپی

پیشگفتار

امی خطِ پوُلُسِ بَلَدِه ايماندارای شارِ فیلیپی نوشته شده.

جماعتِ ايماندارِ شارِ فیلیپی اوّلین جماعتِ ايماندارِ دَ خاکِ

اروپا بود که دَ وسیله پوُلُسِ بُنیاد شی ایشته شد. ای جماعتِ

ايماندارِ دَ مقدونیه، دَ یکی از ولایت های امپراطوری روم قرار

دشت.

پوُلُسِ امی خطِ ره از بندی-خانه از شارِ روم نوشته مونه.

مقصدِ پوُلُسِ از نوشته کدونِ امزی خطِ دَ قدمِ اوّل تَشکُرِ کدو

از ايماندارای شارِ فیلیپی بخاطرِ تحفه های آسته که اونا بَلَدِه

پوره کدونِ ضرورتِ های شی ربی کدد. بعد از تَشکُرِ پوُلُسِ

چند موضوعِ مِهْمِ ره بَلَدِه ازوا مَوگیه:

۱. اونا ره از حال-و-احوال خُو باخبر مونه

۲. اونا ره تشویق مونه که آزارها ره تَحْمَل کده اُستوار

بُمنه و دَ غَیْتِ سختی ها ام خوش بَشه

۳. ازوا خاهش مونه که رقمِ مسیح فروتن بَشه و دَ مینکل

خُو اِتفاق-و-اِتحداد دَشته بَشه

۴. ازوا تقاضا مونه که از تیموتائوس و ایپفرودیئس

پذیرایی گرم کُنه

۵. اونا ره از خطرِ معلمای دروغی خبردار مونه

۶. دَ آخِر پولُس تاکید مونه که اونا خوش بَشه، اِطْمینان

دَشته بَشه، اِتحداد-و-اِتفاق خُو ره حِفْظ کُنه، ایمان خُو ره

نِگاه کُنه و دَ زندگی مسیحی خُو اِدامه بَدیه.

یگ چیزی که کَلو دَ امزی خط دیده موشه شوق-و-علاقه

پولُس بلده جماعتِ ایماندارِ شارِ فیلیپی آسته.

فهرستِ عنوانها

دُعا و سلام (فصل ۱: آیه ۱)

زنجیرای پولُس باعثِ پیشرفتِ خوشخبری موشه (۱: ۱۲)

یگ دلی دَ مسیح (۱: ۲۷)

فروتنی و بزرگی مسیح (۲: ۱)

رقم ستاره ها روشنی بیدید (۱۲:۲)

تیموتائوس و ایپفرو دیتس (۱۹:۲)

مسیح، مقصد حقیقی زندگی (۱:۳)

سُون هَدَف گشتو (۱۲:۳)

نصیحت ها بلده اتفاق و یگ دلی (۲:۴)

شکرگزاری بلده هدیه ها (۱۰:۴)

خاتمه (۲۱:۴)

دُعا و سلام

۱ از طرف پولس و تیموتائوس غلامای مسیح عیسی،

بلده تمام مقدسینی که د مسیح عیسی ایمان دره و د شار

فیلیپی آسته، د شمول سرپرستای جماعت و خادمای. ۲ فیض و

سلامتی از طرف آته مو خدا و مولا عیسی مسیح نصیب شمو

شنه.

۳ هر وختیکه شمو ره د یاد خو میرم، ما خدای خو ره شکر-و-

سپاس موگم. ۴ ما همیشه د هر دُعای خو بلده پگ شمو قد

خوشی دُعا مونم، ۵ چراکه شمو از روز اول تا آلی ره د اعلان

خوشخبری قد ازمه شریک استید. ۶ ما دزی باره اطمینان درم،

خُدای که کار نیک ره دَ وجود شُمو شروع کد، او اُموره تا روز پس اَمَدونِ مسیح عیسیٰ تکمیل مونه. ^۷ بلده ازمه دُرست آسته که دَ باره پگ شُمو امی رقم فکر کنم، چراکه شُمو دَ دل مه آستید، چُون پگ شُمو دَ فیضِ خُدا قد ازمه شریک آستید، ام دَ زنجیر-و-زولانه مه و ام دَ دفاع و اثباتِ خوشخبری. ^۸ خُدا شاهد آسته که قد مهربانی عیسیٰ مسیح چیقس پُشت پگ شُمو دِق شُدیم. ^۹ دُعای مه امی آسته که مُحَبَّت شُمو کلوتر و کلوتر شُنه و قد علم و دانایی کامل قتی بشه ^{۱۰} تا شُمو بتنید بهترین ره انتخاب کُنید و دَ روز پس اَمَدونِ مسیح پاک و بے عیب بشید ^{۱۱} و پُر از ثمرِ عدالت شُنید که دَ وسیله مسیح عیسیٰ بلده جلال و ستایشِ خُدا دَ وجود مییه.

زنجیرای پولس باعثِ پیشرفتِ خوشخبری موشه

^{۱۲} آی برارو، ما میخایم شُمو بدنید، چیزای که دَ سرِ ازمه اَمَد دَ حقیقت باعثِ پیشرفتِ خوشخبری شد، ^{۱۳} دَ اندازه که بلده تمام پیره‌دارای قصر و کسای دیگه معلومدار شد که ما بخاطرِ خدمتِ مسیح بندی آستم؛ ^{۱۴} و بلده غدر برارو زنجیر-و-زولانه مه باعث شد تا اونا دَ مولا اعتماد کده کلوتر جرات کُنه که کلامِ خُدا ره بدونِ ترس اعلان کُنه. ^{۱۵} لیکن بعضی کسا

بخاطرِ حسادت و همچشمی دَ باره مسیح موعظه مونه، ولے
 بعضی کسای دیگه دَ نیتِ نیک. ^{۱۶} امیا از رُوی مُحَبَّتِ ای
 کار ره مونه، چُون میدنه که ما بخاطرِ دِفاع از خوشخبری دَ
 اینجی آندخته شدیم، ^{۱۷} مگم دیگرو از رُوی خودخاهی پیغامِ
 مسیح ره اعلان مونه، نه قد نیتِ پاک، دَ قصد ازی که رنج
 های مَره دَ بندی‌خانه کلوتر کُنه. ^{۱۸} لیکن چی فرق موكُنه؟
 مْهم ای آسته که از هر طریق پیغامِ مسیح اعلان شنه، چی دَ
 نیتِ بد بشه، چی دَ نیتِ نیک؛ و ما دزی باره خوشحال آسْتَم.
 آرے، ما دَ خوشحالی خُو ادامه میدیم. ^{۱۹} چُون ما میدنم که دَ
 وسیله دُعاهای شمو و دَ کومکِ روحِ عیسی مسیح ای چیزا دَ
 نجات مه تمام موشه. ^{۲۰} نظر دَ انتظارِ کلو و امیدِی که دَرَم، دَ
 هیچ چیز شرمنده نموشم، بلکه دَ وسیله توره گفتون مه قد
 جُرأتِ کامل، مسیح آلی ام مثل همیشه دَ وسیله جسم مه
 بزرگی-و-جلال پیدا مونه، چی دَ زندگی مه، چی دَ مرگ مه؛
^{۲۱} چُون بلده از مه زندگی کدو «مسیح» آسته و مُردو دَ فایده
 مه. ^{۲۲} لیکن اگه زندگی کدو دَ جسم بلده مه کارِ پُرْتَمَر آسته،
 اوخته نمیدنم که کدَم شی ره انتخاب کُنم. ^{۲۳} چُون ما دَ بین
 امزی دُو سخت بند مندیم: ما آرزو دَرَم که ای زندگی ره ایله

کُنْم و قد مسیح بَشْم، چُون ای بَلدِه مه کَلو خُو بَتَر اَسْتِه،
 ۲۴ مگم مندون مه دَ جِسْم بَلدِه از شُمو ضروری تر اَسْتِه. ۲۵ و
 ازی که دَ ای باره یَقین دَرْم، ما مِیْدَنُم که زنده مَومَنُم و قد
 پگ شُمو بَلدِه پِیْشَرَفَت و خوشی شُمو دَ ایمان، خِدْمَت خُورِه
 اِدامه مِیْدِیْم، ۲۶ تا اِفْتخار شُمو دَ مسیح عِیْسَى دَ وِسیلِه از مه
 کَلو تَر شُنه و خْتیکه دُوباره دَ پِیْش شُمو مِیْم.

یگ دلی دَ مسیح

۲۷ فقط بطوری رفتار کُنید که لایقِ خوشخبری مسیح بَشِه، تا
 چی ما بیْم و شُمو ره بِنگَرْم و چی از شُمو دُور بَشْم، ما دَ باره
 شُمو بَشَنُوم که شُمو دَ یگ روح اُسْتوار اَسْتِید و قد یگ دِل
 شانه دَ شانه بَلدِه ایمانِ خوشخبری تلاش-و-کوشش مَوکُنید
 ۲۸ و دَ هیچ صُورت از مُخالِفای خُو ترس نَمُوخو رِید. اینمی
 بَلدِه ازوا نشانی نَابُود شُدونِ ازوا اَسْتِه، مگم بَلدِه از شُمو
 عِلَامَتِ نِجَات؛ و ای کارِ خُدا اَسْتِه. ۲۹ چُون دَز شُمو بخاطرِ
 مَسِیح فرصت دَدِه شُد که نَه تنها دَزُو ایمان بَیرید، بَلکِه دَ راه
 ازو رَنج-و-عذاب ام بَکَشِید، ۳۰ چراکه شُمو دَ امزُو کَشْمَکَش
 گِرِفْتار اَسْتِید که دَز مه دِیده بُویدید و آلی ام مِیْشَنَوِید که ما
 هنوز گِرِفْتار اَسْتِم.

فروتنی و بزرگی مسیح

۲ پس اګه کُدم دِ لګرمی د مسیح، اګه کُدم آرامشِ مُحَبَت،
اګه کُدم رفاقتِ روحِ اَلْقُدس و اګه کُدم مهربانی و دِلْسوزی د
وَجُودِ شُمُو آسته،^۲ خوشی مَره کَامِل کُنید یعنی قد یګدِیګه
خُو هَمَنظَر بَشید، مُحَبَتِ دُو جَانِبِه دَشْتِه بَشید و یګ دِل و یګ
فِکَر بَشید.^۳ هیچ کار ره از رُوی هَمچشمی یا خودستایی انجام
نَدید، بَلکِه قد شِکسته-نَفسی دِیګرو ره از خود کده باله تر
بَدَنید.^۴ هیچ کُدم شُمُو تنها د فِکَر فایده خود خُو نَبَشید، بَلکِه
د فِکَر دِیګرو ام بَشید.^۵ اُمُو طرزِ فِکَر دَز شُمُو بَشه که د
مسیح عیسی ا بُود:

۶ اُو که د شکلِ خُدا و جُود دَشْت،

د فِکَر ازی نَشُد که برابری قد خُدا ره محکم بَگیره،

۷ بَلکِه خود ره ازی فِکَر خالی کد

و شکلِ یګ غُلام ره گِرِفْتِه هَم رَنگِ اِنسان جور شُد؛

و اُو د شکلِ اِنسان پَیدا شُد

^۸خود ره فروتن کد

و تا حدِ مَرگ فرمانبردار شُد، حتی مَرگ دَ رُوی

صَلیب.

^۹امزی خاطر خُدا اُو ره بے اندازه سربلند کد

و نامی ره دَزُو بخشید که باله تر از تمام نام ها آسته،

^{۱۰}تا دَ نامِ عیسیٰ هر زانو

دَ آسمو، دَ زمی و دَ زیرِ زمی حَم شُنه

^{۱۱}و هر زبو اقرار کُنه

که عیسیٰ مسیح مَولا آسته

بلده بزرگی-و-جلالِ آته مو خُدا.

رقم ستاره ها روشنی بَدید

^{۱۲}پس آی عزیزای مه، امو رقم که شمو همیشه از مه اطاعت

کډيد، نه تنها د حُضور مه، بلکه آلی که از شُمو دُور اَسْتُم
دیگه ام کَلوتر اِطاعت مُونید، نجات خُو ره قد ترس و لرز
عملی نشو بډید؛^{۱۳} چُون خُدا اَسْتِه که د وجود شُمو کار کده
ام اراده و ام قُدرتِ کار ره بلده خوشی خُو دز شُمو میدیه.
^{۱۴} هر کار ره بَدونِ نِقِ نِق و جَر-و-بَحْت انجام بډید،^{۱۵} تا
بے عیب و پاک و بچکیچای بے نُقصِ خُدا د بَینِ نسلِ ناراست
و گمراه بَشید و د مینکلِ ازوا رقمِ ستاره‌ها د دُنیا روشنی بډید
و کلامِ زندگی ره محکم نِگاه کُنید تا ما بتنم د روزِ پس
اَمَدونِ مَسیحِ اِفتخار کُنم که ما بے فایده ندویدیم و بے فایده
زَحمت نکشیدیم.^{۱۷} لیکن حتی اگه خُون مه رقمِ هدیه وُچی-
کَدنی د بِلَه قُربانی و هدیه ایمان شُمو لَوو شُنه، ما خوش اَسْتُم
و قد پگ شُمو خوشی مُونم.^{۱۸} پس شُمو ام امی رقم خوش
بَشید و قد ازمه خوشی کُنید.

تیموتائوس و ایپفرو دیتس

^{۱۹} ما د مولا عیسی اُمید دَرُم که تیموتائوس ره د زودی د پیش
شُمو رَیی کُنم تا ما ام از حال-و-احوال شُمو باخبر شُده،
خاطرجم شُنم.^{۲۰} چُون ما رقمِ ازو وری کُدم کسِ دیگه ره نَدَرُم
که مُخلصانه د فِکرِ از شُمو بَشه،^{۲۱} چراکه پگ د پُشتِ فایده

خود خو میگرده، نه د پُشتِ کارِ عیسیٰ مسیح. ^{۲۲} مگم شمو
میدنید که تیموتائوس خود خو ره ثابت کده و رقم یگ باچه که
د آته خو خدمت مونه، او قد از مه د کارِ اعلانِ خوشخبری
خدمت کده. ^{۲۳} پس امیدوار استم که هرچند زودتر کارای مه
معلوم شنه، او ره د پیشِ از شمو ربی کتم. ^{۲۴} د مولا اطمینان
درم که ما ام د زودی د پیشِ شمو مییم.

^{۲۵} ولے فعلاً لازم دیدم که ایپرو دیتس ره د پیشِ شمو ربی
کتم. او برار، همکار و همسنگر مه آسته و یگ قاصدِ از شمو
بلده پوره کدونِ ضرورت های مه آسته. ^{۲۶} چون او پُشتِ پگ
شمو دق شدد و ازی که شمو شنیده بوید که او ناجور شده،
او غمگی شدد. ^{۲۷} واقعاً او سخت ناجور و حتی نزدیک د
مردو بود. مگم خدا د بله ازو رحم کد، نه تنها د بله ازو،
بلکه د بله از مه ام، تا ای غم د بله غم های مه اضافه نشنه.
^{۲۸} پس قد کوششِ کلو او ره د پیشِ شمو ربی کدم تا شمو از
دیدونِ ازو بسم خوشحال شنید و غم از مه ام کمتر شنه. ^{۲۹} پس
د احترامِ مولا و قد خوشی کامل از شی پذیرایی کنید و امی
رقم کسا ره احترام کنید، ^{۳۰} چراکه او بخاطرِ کار د راهِ مسیح
نزدیک د مردو شد، چون او جان خو ره د خطر اندخت تا

خِدمتی ره دَز مه انجام بَدیه که شُمو نَتَنِستید انجام بَدید.

مسیح، مقصدِ حقیقی زندگی

۳^۱ خلاصه ای پرارون مه، دَ مولا خوش بشید. نوشته کدون
امزی چیزای تکراری بلده از مه زحمت نیسته، بلکه بلده
حفاظت از شُمو آسته.

۲^۲ امزو سگ ها خود ره احتیاط کنید! امزو آدمای شربیر خود ره
احتیاط کنید! امزو کسای که یگ عضو جسم ره قطع مونه
خود ره احتیاط کنید! ^۳ چون ختنه شده های حقیقی مو آستی
که دَ وسیله روح خدا عبادت مونی و دَ بله مسیح عیسی
افتخار موکنی و دَ جسم توکل نمونی؛ ^۴ اگرچه ما ام دلیل درم
که دَ جسم توکل کنیم. اگه کدم کس دیگه فکر مونه که دَ
جسم توکل دره، ما کلوتر درم: ^۵ ما دَ هشت روزگی ختنه شدیم،
از قوم اسرائیل و از طایفه بنیامین آستم، یگ عبرانی از نسل
عبرانی؛ از نگاه شریعت، فریسی، ^۶ از نگاه غیرت، آزار-و-
اذیت کننده جماعت ایماندارا و از نگاه عدالت شریعت،
بے عیب. ^۷ ولی هر چیزی که دَ فایده مه بود او ره بخاطر

مسیح دَ نَقْصِ خُو دَنَسْتُمْ.^۸ علاوه ازی، تمام چیزا ره دَ برابرِ
 آرزشِ بِلنْدِ شِناسِ مسیحِ عیسیٰ مَولایِ خُو دَ نَقْصِ خُو مِیْدَنْم.
 بخاطرِ ازو ما تمامِ چیزا ره از دِستِ دَدُم و اونا ره خَشپَش
 حسابِ کَدُم تا مسیحِ ره دَ دِستِ بیْرُم^۹ و دَزُو تَعْلُقِ دَشْتِه بَشْم،
 نَه قَدِ عَدَالَتِ خُو که از شریعتِ آسته، بَلْکِه قَدِ عَدَالَتِ
 که دَ وَسِیْلَه ایمانِ دَ مسیحِ دَ دِستِ مییه، عَدَالَتِ که از خُدا یِه
 و دَ بَلَه ایمانِ اُسْتوارِ آسته.^{۱۰} ما میخائیم مسیحِ ره بِنَخْشْم و
 قُدْرَتِ دُوباره زنده شُدون شی و شَرِیکِ شُدو دَ رَنجِ های شی
 ره پیِ بُیْرُم تا دَ مَرگِ شی هَمْرَنگِ ازو شْنَم،^{۱۱} تا از یِگو طَرِیقِ
 ما ام دَ دُوباره زنده شُدونِ مُرده ها بِرَسْم.

سُونِ هَدَفِ گَشْتو

^{۱۲} ایطور نییه که ما پیش از پیش دَ دِستِ اُورْدیم یا گاه کامل
 شُدیم، بَلْکِه دَ پُشتِ شی سختِ میگردُم که او ره دَ دِستِ بیْرُم،
 چراکه مسیحِ عیسیٰ مَره بَلْدِه شی دَ دِستِ اُورْد. ^{۱۳} ای برارو،
 ما ایطور فِکْرِ نَمُونُم که ما دَ دِستِ اُورْدیم، ولے یگ کار ره
 انجامِ مِیْدِیْم: چیزی که دَ پُشتِ سر مه آسته، او ره پُرْمُشت
 مُونُم و سُونِ چیزی که دَ پیشِ رُوی مه آسته، قَدِ کوشِشِ سخت
 پیشِ مورُم؛ ^{۱۴} ما سختِ پُشتِ هَدَفِ میگردُم تا جایزه دعوتِ

آسمانی خُدا ره که دَ مسیح عیسیٰ و جُود دَره دَ دِست بیړم.

^{۱۵} پس پگ ازمو که دَ ایمان بالغ اَستی، بیید که امی رقم فکر کنی؛ و اگه شمو دَ باره یگو چیز کُدم فکر دیگه درید، او ره ام خُدا بلده شمو برملا مونه. ^{۱۶} دَ هر حال، امو چیز ره که دَ دِست اُردے، بیید که دَ مطابق اَمزو رفتار کنی.

^{۱۷} آی برارو، از مه سرمشق بگیرید و نظر شمو دَ کسای بشه که مطابق نمونه که از مو گرفتید، رفتار موکُنه. ^{۱۸} چُون غدر کسا رقم دُشمنای صلیب مسیح زندگی موکُنه؛ ما بارها دَ باره ازوا دَز شمو گفتیم و آلی ام قد چیمای پُر اودیده دَز شمو موگم. ^{۱۹} عاقبت ازوا نابودی آسته، خُدای ازوا کوره ازوا یه، افتخار ازوا دَ بله کارای شرم آور ازوا آسته و فکر های ازوا دَ چیزای دُنیایی آسته. ^{۲۰} لیکن وطن اصلی ازمو عالم باله آسته که مو چیم دَ راه یگ نجات دهنده، یعنی مولا عیسیٰ مسیح ازونجی اَستی. ^{۲۱} او جسم خار-و-حقیر مو ره تبدیل مونه تاکه رقم جسم پُر جلال ازو جور شنه؛ او دَ وسیله قوتی که دَزو قدرت میدیه ای کار ره مونه تا تمام چیزا ره دَ زیر فرمان خو بیړه.

^{۲۲} امزی خاطر آی برارون مه که شمو ره دوست درم و پشت

شُمُو دِقْ شُدِيم و شُمُو باعِثِ خوشی و تاجِ اِفْتخارِ مه اَسْتِيد،
امی رقم دَ مَولا محکم-و-اَسْتوارِ بُمْنِيد، آی عزیزای مه.

نصیحتِ ها بلده اِتفاقِ و یگِ دلی

^۲ از اِفودیه خاهشِ مُونُم و دَ پیشِ سِینتِیخی زاری مُونُم که هر
دُوی شی دَ خِدْمَتِ مَولا یگِدِلِ بَشَه. ^۳ و از تُو ام آی همکارِ
حقیقی، خاهشِ مُونُم که قد امزی خاتونو دَزی باره کومک
کُنی، چراکه اونا دَ کارِ اِعلانِ خوشخبری قد از مه تلاش-و-
کوششِ کده، امچنان قد کلیمِنْتَس و دیگه همکارای مه که نامِ
ازوا دَ کتابِ حیاتِ ثَبِتِ شُدَه.

^۴ همیشه دَ مَولا خوش بَشِيد، بَسْمِ مُوگِیم، خوش بَشِيد! ^۵ بیلید
که نَرَمی-و-مُلايِمَتِ شُمُو دَ پگ معلومدار شنه. اَمَدونِ مَولا
نزدیک اَسْتَه. ^۶ دَ باره هیچ چیز تشویش نَکُنید، بلکه دَ هر چیز
قد دُعا و عُدْر-و-زاری که قد شُکرگُزاری قتی بَشَه، درخواست
های خُوره دَ حُضُورِ خُدا پیش کُنید. ^۷ اوخته آرامشِ خُدا که از
تمامِ فامیدگی ها کده باله تر اَسْتَه، دِلِ ها و فِکرای شُموره دَ
مسیحِ عیسی نِگاهِ مونه.

^۸ خُلاصه آي برارو، هر چيزي كه راست، هر چيزي كه قابلِ احترام، هر چيزي كه عادلانه، هر چيزي كه پاك، هر چيزي كه پسندیده و هر چيزي كه قابلِ توصيف آسته، و اگه كُدم چيز به اندازه خوب و اگه كُدم چيز قابلِ ستايش آسته، دَ باره شي فكر كُنيد. ^۹ چيزاي ره كه از مه ياد گرفتيد يا حاصلِ كديد يا شنيديد و يا دَ ز مه ديديد، اونا ره عملي كُنيد و خُداي آرامش قد شُمو آسته.

شكرگزارى بلده هديه ها

^{۱۰} ما دَ مولا كَلو خوش آستُم كه آلى شُمو بسمِ فكر خُو ره دَ باره از مه تازه كديد؛ دَ حقيقت شُمو دَ فكرِ از مه بُويد، مگم فرصت نَدشتيد كه بَرَملا كُنيد. ^{۱۱} ابطور نيسته كه ما اي ره از رُوى احتياج بُگيم، چُون ما ياد گرفتيم كه دَ هر حالت كه بَشُم، قناعت كُنم. ^{۱۲} ما ميدنُم كه نادارى چيز خيل آسته و ام ميدنُم كه دارا بُودو چيز خيل آسته. دَ هر حالت و دَ تمام شرايط ما راز قناعت ره ياد گرفتيم، ام دَ حالتِ سيري و ام دَ حالتِ كُشنَكي، ام دَ پريمونى و ام دَ احتياج. ^{۱۳} ما هر كار ره دَ وسيله امزو كه مَره قُوت ميديه، ميتنُم انجام بديم. ^{۱۴} دَ هر صورت، شُمو لُطف-و-مهربانى كديد كه دَ رنج-و-پريشانى مه شريك شُديد.

^{۱۵} آی فیلیپیا، شمو خوب میدنید که د شروع اعلان

خوشخبری، وختیکه از مقدونیه ری شد، بغیر از شمو هیچ

جماعت ایماندارا د حساب داد و گرفت قد از مه همکاری

نکد. ^{۱۶} چون حتی وختیکه د شار تسالونیکي بودم، یگ یا دو

دفعه شمو بلده ضرورت مه کومک ری کدید. ^{۱۷} ایطور نیسته

که ما از شمو کومک طلب دشته بشم، بلکه د طلب اجری

استم که میخایم د حساب شمو اضافه شنه. ^{۱۸} تمام چیزا

بطور کامل دز مه رسید و آلی از حد کلو درم. کومک های

شمو از دست ایفرو دیتس دز مه رسید و ضرورت مه پوره

شد؛ کومک های شمو یگ هدیه خوشبوی، یگ قربانی قابل

قبول و مورد پسند خدا آسته. ^{۱۹} و خدای مه تمام ضرورت

های شمو ره مطابق دولت مندی پر جلال خو که د مسیح عیسی

وجود دره، پوره موکنه. ^{۲۰} د آته مو خدا تا ابدالآباد بزرگی-و-

جلال باد. آمین.

خاتمه

^{۲۱} تمام مقدسین ره که د مسیح عیسی تعلق دره سلام بگید.

برارونی که قد از مه آسته شمو ره سلام موگیه. ^{۲۲} تمام

مقدسین دز شمو سلام میرسنه، خصوصاً کسای که از خانه

قَيصر آسته.

۲۳ فَيضِ مَوْلَايِ مَوْ عيسَىٰ مَسِيحِ قَدْ رُوحِ پِگِ شُمو بَشَه.
آمين.

سوال داريد؟ +1 807.700.6090

آزرگي © afghanbibles.org

Copyrighted material not for reprint/publishing purposes.